

Carta tucu nú uquie'e San Pablo lu bee bene eyeche Tesalónica enu nzeli arqui' Jesucristo

Uxe'la Pablo saludo

1 Li'á Pablo, cuna Silvano nu Timoteo, rquie'eru carta quie' luhua, li'ihua bee enu nzeli arqui' Jesucristo eyeche Tesalónica, li'ihua bee enu neca bee bene' Diose Pa liñibe cuna Jesucristo enu rnibya!. Ri'i Diose nú cha nze'ca lu cuenda'hua cuna nú nzuke arqui'hua.

Rdete' Pablo che'tsa lu Diose equie cuenda' bee bene Tesalónica

2 Ye bichia rdete'ru che'tsa lu Diose lu cuenda' yehua nu la zañi'rū rnacu'rū lunu equie cuenda'hua ye chenu rnacu'rū lunu.
3 Cada chenu rmacu'rū lu Diose Pa'ahua li'iru rlu'cu cuendaru ye beenú rri'ihua xne nzeli arqui'hua li'inu, nu li'iru rlu'cu cuendaru lunú rri'ihua xne secahua bee sa'hua nu le'ca rlu'cu cuendaru nu li'ihua neli nucua'aquiehua nú benchila' zeca Jesucristo enu rnibya!. **4** Bee sa'a enu nzeli arquia'ahua Jesucristo, li'iru neduya'rū nu seca Diose li'ihua nu li'inu ucañinu li'ihua.

5 Xne chenu udixiule'eru bedichia' nze'ca' Jesucristo luhua, la neca nú uzete'tsiaru li'ihua cuna bee bedichia'tsia sino que uzete'ru li'ihua cuna poder' Espíritu Santo nu neduya'rū nú neli neca lunú rniru luhua. Li'ihua neduya'hua xneca uri'iru chenu ullua'aru cuna li'ihua, uhuañiru scua para nú lube'ru luhua nú xneca riala nú huañihua. **6** Nu li'ihua nehuañihua tucu nú uhuañiru nu tucu nú uzete' Jesucristo li'iru, nu equie cueda' Espíritu Santo ñia utsu arqui'hua uyalí arqui'hua bee bedichia' nú udixiule'eru luhua añinzuca nú chiqui' nehuana ulle'cahu. **7** Scua necahua tucu ejemplu lu ye bee bene lu iliu Macedonia cuna lu iliu Acaya ante lu bee enu nzeli arqui' Jesucristo. **8** Nu equie cuenda' li'ihua uri'chialestse stichia' Jesucristo nu la neca nucua' nú unga lu iliu Macedonia cuna lu iliu Acaya tsia, sino que ye bee luhuare rni bee bene xneca nzeli arqui'hua Diose hasta nú leca' xi rqui'ñá nú niláru lubee bene equie cuenda' li'ihua. **9** Xne li'i e'cu beeí rnibeeí

lubee bene lunú xneca uyucuhua li'iru bese rlu chenu ubelabi'yaru li'ihua, nu xneca utsana arqui'hua bee enu secahua nú neca diose para nú chili arqui'hua Diose enu nehuañi nu zibi'hua lunu, li'inu enu neli neca Diose. ¹⁰Nu le'ca rnibeei nú xneca nucua'aquiehua bichia chenu nze'ta zeca Jesucristo Lli'ñi Diose enza liñibe, li'inu enu uril'i Diose nú uhuañi leta bee benenguti. Jesucristo enu sila'a lia'ahua lu castiya llene nú nzu nú nze'ta.

Lunú uri'i Pablo eyeche Tesalónica

2 Bee sa'a enu tucutse nzeli arquia'ahua Jesucristo, li'ihua nediya'hua nú né yela xle'era chenu ubela bi'yaru li'ihua, ²añinzuca nú nediya' nze'ca'hua lunú xneca udiquichi'qui' bee bene li'iru nu xitse uri'inubeei li'iru eyeche Filipos. Pero uril'i Diose elietsa luru nú utsu naaqui arqui'ru udixiule'era bedichia' nze'ca'nu luhua añinzuca nú nehuana ulle'caru equie cuenda' nú ulee bee bene luru. ³Xne li'iru uniru luhua puro nú neli neca nu lá ri'iru luhua tucu nú niarqui'tsiaru urre para nú zequienuru li'ihua. ⁴Sino que scua tucu nú ucañila Diose li'iru para nú dixiule'era bee bedichia' nze'ca'nu lubee bene nu ularñi'nu nú acaru ri'iru lunú riala nú ri'iru, nu scua necane tucu nú udixiule'era lubee bene. La necane para nú ya'na nze'caru lubee bene sino ante lu Diose. Li'inu enu nu'l'u xa nchiñi arqui' bee bene. ⁵Li'ihua nediya'hua nú leca xunga uzucu' ayaru li'ihua para nú zecahua li'iru, nu le'ca lá la'naru nú xneca modo ri'iru ana dimi'hua, Diose

nediya' nú neli necane scua. ⁶Le'ca la la'naru nú zucu' aya bee bene li'iru, nu la la'naru nú zucu' ayahua li'iru urre nú zucu' aya stucu bee bene li'iru, añinzuca nú nu' modo nú nibiya'ru luhua nú ri'ihua luru lunú niarqui'ru, né ri'iru scua luhua. ⁷Li'ihua nediya'hua xa uri'i nze'caru luhua chenu ullua'aru cuna li'ihua, tucu nú rri'i tucu naa enu chiqui' rriucu bee lli'ñi. ⁸Nu lunú chiqui' se'caru li'ihua laneca nú Stichia' Diose tsia rixiule'era luhua sino que lecaxi ri'i máse nú úti bee bene li'iru lunú chiqui' se'caru li'ihua. ⁹Nu li'ihua bee sa'ru enu nzeli arqui'hua Jesucristo nediya'hua nú chiqui' ula'naru nú uri'iru riñi'. Bichia si rula' uril'iru riñi' para nú la qui'ñia nú ari'ihua elietsa luru diqui nú uzete'ru li'ihua bee bedichia' nze'ca' Diose.

¹⁰Nediyia' nze'ca' Diose nú le'ca li'ihua nediya'hua nú xneca uhuañiru ante luhua, nu lecali xi dula lu'curu, nu sin nú lecaxi ta'quiyahua li'iru, li'ihua bee enu nzeli arqui' Jesucristo. ¹¹Le'ca nediya'hua xneca uniru bezete' luhua nu xneca udu'uru ana arqui'hua tucu nú rri'i pa' endu' lu endu'. ¹²Nu unilaru luhua nú huañihua tucu nú riala huañi bee bene' Diose, li'inu enu rixia li'ihua para nú huañihua cuna li'inu liñibe elu rnibuya'nu. ¹³Enze'e le'ca li'iru la tsuxeru nú rdete'ru che'tsa lu Diose nú chenu ubene'hua stichia'nu nú udixiule'era luhua uril'i casohuane lunú neli necane Stichia' Diose, nu lanecatsiae stichia' bee bene iliulabe. Nu bee bedichia' cua' neca nú rri'i riñi'

arqui'hua, li'ihua bee enu nzeli arqui' Jesucristo. ¹⁴Nu li'ihua bee sa'ru enu nzeli arquia'ahua Jesucristo. Tucutse ulle'ca'la'ahua tucu nú ulle'ca bee bene' Diose enu neca bee bene Judea enu nzeli arqui' Jesucristo. Xne scua tucu nú nehuana uri'linu bee sa'beella bee bene Israel li'ibeella le'ca scua nehuana uri'linu bee bene lachihua li'ihua. ¹⁵Nu le'ca bee bene Israel unguuti beei Jesuse enu rnibiya' lua'ahua nu le'ca unguuti beei bee profeta, nu le'ca utiliaca' beei li'iru nu la ri'ibeei tucu nú niarqui' Diose, nu rlebee lu ye bee bene. ¹⁶Nu uca beei nú udixiule'era bedichia' nze'ca' Diose lubee bene enu la neca bee bene Israel nú xneca tsila'a beella, scua le'ca li'ibeei rri'ibeei nú rdalalá stula beei, nu nee chiqui'la nehuana seca beei.

**Niarqui' Pablo nú chazecalla
eyeche Tesalónica**

¹⁷Bee sa'ru enu nzeli arquia'ahua Jesucristo, li'iru utsa'naru li'ihua chiucu chuna bichia, añinzuca nú la lañi'ru li'ihua pero nchiucu' arqui'ru li'ihua nu chiqui' niarqui'ru nú lañi' zeca'ru li'ihua stucu bese. ¹⁸Nu chiqui' uniarqui'ru nú nzelabi'yaru li'ihua, li'á Pablo huaxi bese uniarquia nú nzelabi'ya li'ihua. Pero uca beze'lu nú acae scua. ¹⁹Pero niarqui'sca'ru nzelabi'yaru li'ihua xne nzucu luru nú li'ihua necahua enu rri'i nú ñia nzu arqui'ru, li'ihua necahua riña' nú nellíñianuru nú riñayuru lu Jesucristo enu rnibiya' bichia chenu nze'ta zecanu. ²⁰Li'ihua necahua enu rri'i nú ñia nzu arqui'ru nu equie cuenda'hua nellíñiaru.

3 Enze'e chenu ullua'aru eyeche Atenas chiqui' niarqui'ru ri'iru beya' xa nucua'ahua, chequie uri'iru elliebacu' nú ya'na li'itsiaru ze'e. ²Nu uxe'laru sa'ahua Timoteo enu neca tucu sa'ahua enu rri'inuru riña' Diose nú rixiule'era bedichia' nze'ca' Jesucristo lubee bene para nú du'lla ana arqui'hua nú tsuta' arqui'hua lunú nzelila arqui'hua Jesucristo. ³Para nú ni'tucuhua la lacaquiehua lunú nehuana secahua, li'ihua nediyahua nú scua riala nú zeca'ahua. ⁴Chenu ullua'anuru li'ihua udixiule'era luhua nú nze'ta nú chiqui' huaxi nú nehuana zeca'ahua, nu li'ihua nediyahua nú scua ungae. ⁵Nu lunú chiqui' niarquia lañiahua che uxe'la Timoteo luhua para nú ri'lá beya' xa nzenalahua lunú nzeli arqui'hua Jesucristo. Xne xiquia nú cá zequieno beze'lu li'ihua, nu che xle'e uri'iru lunú uri'iru.

⁶Pero nee nú ubenchila' Timoteo nú ube'tabi'yalla li'ihua, udixiule'ella luru nú nza nze'cahua lunú nzeli arqui'hua Jesucristo nu xneca secahua bee sa'hua. Li'illa rnilla nú yeye'e ñia nzu arqui'hua rellu'cu' arqui'hua li'iru nu chiqui' niarqui'hua nú ala' nú ulañi'la'hua li'iru nú secahua, scua tucu nú le'ca chiqui' niarqui'ru lañi'ru li'ihua. ⁷Enze'e, bee sa'a enu nzeli arquia'ahua Jesucristo añinzuca nú yelu nú se'caru nu chiqui' nehuana se'caru, pero chiqui' ñia nzu arqui'ru ubene'ru nú nza nze'cahua lunú nzeli arqui'hua. ⁸Nu nee másela xila' arqui'ru equie nú ungabiyahua'la'ru nú neli nzuta' arqui'hua nzenalahua inziu'

Jesucristo. ⁹Enze'e hasta ni' la llela' arqui'ru xa dete'ru che'tsa lu Diose equie cuenda'hua equie nú chiqui' ñia nzu arqui'ru equie cuenda'hua lu Pa'ahua Diose. ¹⁰Bichia si rula' rnacu'ru nu sequieru lu Diose para nú zelanu nú nzelabi'yaru li'ihua, nu la'xuru niru luhua lunú rri'ilá nú ri'ihua beya' lunú nzeli arqui'huá Jesucristo.

¹¹Diose Pa'ahua cuna Jesucristo enu rnibiya' ri'inu elietsa luhua nú aca nzelabi'yaru li'ihua. ¹²Nu Jesucristo ri'linu elietsa luhua para nú másescalá nze zecahua bee sa'hua nu zecahua ye beelá bee bene tucu nú se'caru li'ihua. ¹³Jesucristo neca enu ri'i elietsa luhua nú tsuta' arqui'huá riñahua lu Diose sin dula nu lecaxi nahua, bichia chenu nze'ta zeca Jesucristo cuna ye bee bene'nu.

Xa niarqui' Diose nú huañi bee bene'nu

4 Nee bee sa'a enu nzeli arquia'ahua Jesucristo nacu'ru nu zequieru luhua equie cuenda' Jesucristo enu rnibiya', nu scua tucu nú nehuañihua nee tucu nú uzete'laru li'ihua nú huañihua para nú ri'ihua tucu nú niarqui' Diose, másela uyanalahua nú huañihua tucu nú niarqui' Diose nú huañihua.

²Xne li'ihua nediyala'hua ye nú unibiya' Jesucristo luru nú niru luhua nú ri'ihua. ³Lunú niarqui' Diose necane nú huañihua sin dula nu la ri'ihua eluhuexe. ⁴Nu cada tucuhua uri'ihua beya' xa huañi nze'cahuá cuna una'ahua urre niyu'huá tucu nú rnibiya' Diose cuna ula'na. ⁵La lu'cuahua una'huá

para nú ri'ihua bee elliebacu' nú nechá neca, nu ni' beenú necha neca riu'u ana arqui'huá rri'ihua, xi rri'i bee bene enu la chulu Diose. ⁶Le'ca ni' tucuhua la yala nú detehua lunú xitse ri'ihua bee sa'hua nu la zequienhua sa'hua xne Diose Pa'ahua dete' castiya ye bee bene enu rri'i scua tucu nú unilaru nu udixiule'elaru luhua. ⁷Xne né bixia Diose lia'ahua nu neca'ahua bee bene'nu para nú nechá huañia'ahua, sino que para nú huañia'ahua nú leca xi na'ahua lunu. ⁸Enze'e bee enu la ri'i caso lunú unilaru luhua, la necane nu lu bee bene iliulabe la ri'i casolla, sino que Diose neca enu la ri'i casolla. Li'inu enu rliqui' Espíritu Santo luhua.

⁹Nu nee lunú xa riala zecahua bee sa'hua la qui'ñia nú nilá luhua lu cuenda' nucua' xne le'ca li'ihua ungalahua equie cuenda' Diose nú xneca riala nú zecahua beelá bee bene. ¹⁰Nu nucua' neca lunú rri'ihua cuna ye bee sa'hua enu nzeli arqui' Jesucristo enza Macedonia. Pero nacua nu zequiaa luhua nú másela zecaláhuá bee sa'ahua. ¹¹Le'ca ula'nahua nú huañihua nú nzuxe arqui'huá,uzu'cu'luhua riña'huá, tucu nú unilaru luhua nú ri'ihua riña', ¹²Para nú huañi nze'cahuá lu bee bene enu la chili arqui' Jesucristo nu para nú leca xi zecala'cha'huá.

Chenu nze'ta zeca Jesucristo

¹³Nee bee sa'a enu nzeli arquia'ahua Jesucristo, la niarqui'ru nú huañihua sin nú ri'ihua beya' equie cuenda' bee bene enu unguti

para nú la nehuana nzu arqui'hua xi rri'i bee bene enu la chili arqui' Jesucristo.¹⁴ Tucu nú nzeli arquia'ahua nú unguti Jesucristo nu uhuañi zecanu stucu bese, le'ca nzeli arquia'ahua nu bee enu ungutila nu nzeli arqui' Jesucristo, le'ca ri'i Diose nú huañi zeca beella equie cuenda' Jesucristo.

¹⁵ Enze'e tucu nú nediyal'a'ahua stichia' Jesucristo, li'iru nirus luhua nú ye bee bene' Jesucristo enu nehuañisca' chenu nze'ta zecanu stucu bese, la zuculu beella lu bee bene'nú enu ungutila.¹⁶ Nu bichia ze'e yene chi enu rnibya' nú xneca aca, nu yene chi ángele enu rnibya' lu ye bee ángele, yene chi trompeta' Diose. Nu enta Jesucristo enza liñibe nu rluti bee bene'nú enu ungutila huañi zeca beella stucu bese.¹⁷ Chequie bee sa'ahua enu nehuañisca' bichia ze'e yete' sa'ahua cuna bee bene enu huañi zeca, nu chu nzia'ahua enza liñibe leta xcabe elu lla'ca'ahua Jesucristo scua nzia'ahua huañilia'ahua cuna li'inu.¹⁸ Enze'e udu'hua ana arqui' bee sa'hua cuna bee bedichia' cua'.

5 Nee bee sa'a enu nzeli arquia'ahua Jesucristo la qui'ña nú nia luhua equie cuenda' nú xi bichia nu xunga aca bee nucua!.² Xne li'ihua nediyal'a'ahua nú xi neca chenu tu'natsia rriña tucu huana' rula', scua aca bichia chenu riña zeca Jesucristo stucu bese.³ Chenu ni bee bene: "Nú yene nza nze'cae, lecaxi aca", che tu'natsia riña nú nehuana zeca beella nu la tsila'a beella lu nucua!, scua tucu nú tu'natsia rriña nú rlachi xla'cu una'a enu ala endu!.⁴ Pero li'ihua

bee sa'a enu nzeli arquia'ahua Jesucristo, la chahua inziu nú necabe nzu para nú la na'tse bichia chenu riña zeca Jesucristo li'ihua, xi neca chenu rriña tucu huana!.⁵ Xne yehua nzequielahua ellie' Diose, yehua nzenalahua inziu'nú. La chenala'ahua inziu nú necabe nzu, nu le'ca la chenala'ahua inziu nú nechá neca.⁶ Enze'e la yala nú huañia'ahua xi neca tucu bene enu ra'tse, tucu nú rri'i beelá bee bene, sino que rqui'ña nú hua'ahua cala' lua'ahua nu ria'ahua lunú sibi!.⁷ Bee bene enu nzenala inziu nú nechá neca, neca beella xi neca tucu bene enu ra'tse, xi neca tucu bene enu xuchi', scua nzenala beella inziu nu necha neca.⁸ Pero lia'ahua enu nzenalala'ahua ellie' Diose, ye bichia rqui'ña nú huañia'ahua nu ria'ahua lunú sibi!. Bi'ya'ahua lia'ahua lunú nzu teneli arquia'ahua lu elu seca' Diose, nu tsuta' arquia'ahua lunú nzuculua'ahua nú utsila'ala Diose lia'ahua.⁹ Xne né bixia Diose lia'ahua para nú liqui'nu castiya lua'ahua, sino que ubixianu lia'ahua para nú tsila'ahua equie cuenda' Jesucristo enu rnibya' lua'ahua.¹⁰ Li'inu enu unguti equie cuenda'ahua para nú mase nú nehuña'ahua urre mase nú ungutila'ahua chenu nze'ta zecanu stucu bese, pero nzia'ahua huañia'ahua cuna li'inu.¹¹ Enze'e udu'hua ana arqui' sa'hua nu uri'ihua elietsa lu sa'hua para nú másela nzeri'iláhua beya' lunú rri'ilahua.

**Uni Pablo lunú ri'i bee bene
enu nzeli arqui' Jesucristo**

¹² Bee sa'a enu nzeli arquia'ahua Jesucristo, nacu'ru nu ziquieru

luhua, nú lu'cuhua ula'na lu bee
bene enu sete' li'ihua Stichia' Diose.
Li'ibeella enu sete' li'ihua nu rni
bezete' luhua nú xneca chenalahua
Jesucristo. ¹³Uri'i nze'cahuá
lubeella nu chiquí' uzecahua
li'ibeella equie cuenda' riña' nú rri'i
beella. Nu uhuañi nze'cahuá cuna
sa'hua.

¹⁴Le'ca nacu'ru luhua bee sa'a
enu nzeli arquia'ahua Jesucristo nú
qui'ya'huá bee bene enu nebichiu
nu udu'huá ana arqui' bee bene
enu rlacaquíe lu Stichia' Diose nu
uri'ihua elietsa lu bee bene enu
lasca' tsuta' arqui' lu Stichia' Diose,
nu utsuquie arqui'huá ye beella.

¹⁵Ubi'yahua nú la ri'ihua nú
nechá neca lu bee bene enu rri'i
nú nechá neca luhua, mejora aca
nze'cahuá lu bee sa'hua cuna lu ye
bee bene.

¹⁶Nia tsu arqui'huá diqui nú
nehuañihua. ¹⁷Nu yee ye'e na'cuhua
lu Diose. ¹⁸De'tehua che'tsa lu
Diose equie cuenda' yeene, xne scua
riu' arqui' Diose nú ri'ihua, li'ihua
enu neca bee bene' Jesucristo.

¹⁹Uzelahua nú nibiya' Espíritu
Santo luhua. ²⁰La huachuhua nu
rni bee bene enu rdete' Stichia'

Diose lubee bene. ²¹Rluti uri'i
nze'caxuhua beya' tunu neli ye
lunú rni beella, nu ri'ihua lunú
neca nze'ca. ²²Uchiu'u chuhua lu ye
beenú nechá neca.

²³Nu Pa'ahua Diose enu rri'i nú
nzuxe arquia'ahua ri'inu elietsa
luhua para nú lecali xi na arqui'huá
ante lunu. Nu li'inu acanu'nu li'ihua,
cuna espíritu'huá, cuna diqui lunú
necahua para nú lecali xi nahua
bichia chenu riña zeca Jesucristo
enu rnibiyá' lua'ahua. ²⁴Nu Diose
ri'i scua, xne li'inu enu rixia
lia'ahua para nú neca'ahua bene'nu,
neli sa'alunu stichia'nu.

Último bee bedichia' nú nequie lu carta quie'

²⁵Bee sa'a enu nzeli arquia'ahua
Jesucristo, una'cu'huá lu Diose
equie cuenda'ru. ²⁶Uri'ihua saludar
ye bee sa'ahua enu nzeli arqui'
Jesucristo nu uchi'chihua li'ibeella.

²⁷Nu equie cuenda' Jesucristo
nibiyá'a luhua nu nia luhua, nú
ulahua carta quie' lu ye bee
sa'ahua enu nzeli arqui' Jesucristo.

²⁸Nu Jesucristo enu rnibiyá'
lua'ahua ri'inu nú cha nze'ca lu
cuenda'huá.